

# OMUKUETU

N:o 11

NOVEMBER

1952

## ONGOJE OMUKUASHILONGO SHINI? Evangelii pa Lukas 17:20-25.

Aafarisaji naanongoramata naakuluntu joshiguana shaajuda oja pulapulile Omuua Jesus oshilongo sha Kalunga neholoko ljasho. Jo inaje shi dimbulula, nando ja tala Omukuanilua guasho montaneho jauo. Ojo inaje shi dimbulula, 'jo inaje shi hala, oshoka inashi holoka nesimano, inashi ja noonkondo nuujamba u'uujuni mbuka, ngashi je shi hala shi holoke. Jesus Omuua sho a holoka mokati kauo meifupipiko nomunambili, ojo inaje mu taamba, inaje mu hala, oshoka ojo ja lalakanene uukuluntu nesimano nuujamba u'uujuni mbuka. Noshu ja njengua okuja mo moshilongo shesilohenda lja Kalunga, nando je shi etelua k'Omuua Jesus. Oshilongo shika oje shi dini nOmukuanilua guasho, Omuua guesimano, oje mu aalelicile momushigakano. Onke ano oshilongo sha Kalunga, oshilongo shesilohenda no shehupico no shelaago oshe ja kucua no sha peua iiguana jaapagani.

Aakuetu, auambo aaholike! Oshilongo sha Kalunga, nokutja epangelo nelelo ljesilohenda lja Kalunga, oshe ja no miilongo mbika jauambo, oshoka evangeli ljoshilongo shika shesilohenda lja Kalunga olja ciki no miilongo mbika jauambo no lja uuvicilua auambo no natango tali uuvicua.

Ihe no miilongo mbika oshilongo sha Kalunga oshe ja shaa nesimano, shaa noonkondo, shaa nuujamba u'uujuni mbuka, sho sha ningi omacimbo omale sha dinika no kaauambo ojendji, no sha li shi tondike, no nena ndjika shi tondike kojendji.

Ihe onkene oshilongo shesilohenda lja Kalunga osha ciki no kaauambo no sha etele auambo ehupico nelaago lja shili.

Omukriste omukuetu, otse na ngoje otua taambelua nokuli moshilongo shika shesilohenda lja Kalunga, tse sho tua hanganicua na Kalunga mejogo ljevalululo, omeshasho ejapuki.

Omukuetu, ua dimbulula tuu elaago mpoka li cike, lje ku aada, onkene ua siluahenda ku Kalunga, sho ua uuvicilua no ua longua evangeli lje hupico no ua shashelua medina lja Kalunga katatugumue? Osho ua taambelua moshilongo shesilohenda lja Kalunga.

Ihe onkene tuu tu ipuleni atuheni ngele otse aakuashilongo shesilohenda lja Kalunga shili? --- Nenge pamue tu li po tua f'omujengeli (omusita) guegongalo ljo ku Sarde, ngoka a njenjetelua k'Omuua: „U nedina ua fa u nomuenjo, no ua sa.“

Eno, palutu otu li megongalo lja Kalunga nomadina getu oge li mooramata degongalo, ihe tu li po tuu aapangelua ja Kalunga shili? Tu ipuleni naua koshipala sha Kalunga noku mu galikana oje muene e tu penduce shili, tuua ifundjaleke.

Aakuashilongohenda ja Kalunga ja shili oolje ano? Omboka ja valululua shili komeja no k'Ombepo Ondjapuki, ojo ajeke (Joh. 3: 3, 5) Omboka ji itedulula shili (Mat. 3:2, 4:17, 18:3) Omboka ji itaala shili Omuua Jesus Kristus no ji igandja kuje mevuliko ljeitaalo (Joh. 3: 16, 36) Omboka haa endicua k'Ombepo ja Kalunga (Rom.8:14) jo ihaa ende, jo ihaa kala panjama. (Rom. 8: 4, 12, 13)

Ojo ajeke no taa ka mona uo ompito okuja mo moshilongo sha Kalunga shomuujelele no meadimo ljaaluheluhe omegulu lje.— Omukuetu, na ngoje omo ua hala mo, ndi shi. Eno, na ngame omo nda hala mo. Tu zimineni ano shili kehe esiku kehe ecimbo epangelo nelelo lja Tate Kalunga ketu no lja Omuua Omukulili guetu Jesus Kristus. Kalunga kesilohenda e tu icanene esimano lje ljaaluhe mu Kristus. (1 Petr. 1:10) Ihe ondjila oja cinana. Ihe Omuua Jesus Kristus oku li pamue natse. Oje a peua oonkondo adije. Oje ta vulu oku tu piticila mo muudigu aube noku tu ciki-ka kecikilo. Amen.

## OMUDIPAGI TA TAAMBUA PEHA LJAADIPAGUA NO TA FALUA KU JESUS.

Yang Won Son o'e omukriste omujapan, okua longo mokati kaanuulepera, noshilonga she sha jambekua shili. Okua longo oomvula omilongo mbali moshipangelo Josu Ajang Sanatorium. Uudigu uaanuulepera okue u humbata nokue ja jakula medina lja Jesus. Aanuulepera ojo ja li ongojana, ojo no je mu taamba moomuenjo dauo ong'ohu jauo, no kuumelela kauo. Oshilonga shika she okue shi hokua, nokua njanjukilua ecimbo ndika e li na mokati kaanuulepera, noku ja uuvicila ohoole onkumici ja Kalunga noo-

nkondo dejumuko lja Jesus Kristus. Ojendji okukala kuauo kua lunduluka shili, no ja manguluka moonkandja dokomuenjo, nando omalutu ga kala natango muujehame u' uulepera.

Popepielela ljomutimo gua Yang Won Son opua li ojana mboka e ja vala panjama. Okua li e na ojana aamati jatatu naakadonna. Ojo oja li moskola mu Sunchon, ja longue okujakula aavu, uunene aakulupe. Etegameno ljomusamane Y. W. Son olja li lja huama poshinima tuu shika, aamuandje otaa ke ja uo aalanduli jandje moshilonga shika. Aanona uo oju uvite eicano moshilonga shika.

Uudigu ua tukuluka moshilongo. - Aakommunisti aakaanakona-shanakalunga oje ja moshilando shauo nomoskola moka aana ja Y. W. Son taa longua. Oshikungulu shomahepeko sha tameke, o-matidagano nomadipago nokuli. Aana ja Y. W. Son ja tsoongolo pamue ja galikane egalikano lja hugunina ajehe naamuajinaka dona opo ja topoke no je ja tume mpoka taa vulu oku ka holama, puua nomahopeko. Aamati mboka jaali oja ti, itaa kambadala nando okuja ontuku nokuciga po egumbo, ojo ajehe jaali je shi shi, ojo aalongua jOmuua Jesus. Ojo oja li ngaa ja tila ekommunisti omahepeko galjo.

Esiku ndjoka aantu ojendji ja dipagua komikalo odindji omi-uinaji, noshilando sha hanagulua po. Uukommunisti ua taamba epangelo moshilando. Omunaskola omukuauo guaana ja Y. W. Son okue ja kaandja Y. W. Son nokua kumagida omuna omukuluntu gua Y. W. Son a tuke Kalunga je i itule mongundu jaakaanakona-shanakalunga, opo a kale naua. Omuna gua Y. W. Son a denge ompadi pevi, a ti: „Aue!“ Opo tuu mpoka ojo no je mu nukile, no je mu kuata taje mu kokolola je mu ukica keha ljomadipage-lo. Sho je mu kokolola, ombinzi ja zi muje ja tikile pevi ojindji, no manga taje mu kokolola, je ote ja uuvicile Omuua Jesus, no te ja galikana ji igandje ku Kalunga moluekulilo li li mu Jesus.

Ondenge jomukuauo okua matuka a popi najo, te ja indile je ece omukuluntu gue jo je mu pitike oje a ka se peha lje, shaa tuu taje mu hupica. Inashi kuaca. Konima jokacimbo omumati omukuluntu a si, osho uo ondenge je a jahua noshuambe. Sho ja si ajehe, oja langekua ja tegama.

Oluhodi luomusamane Y. W. Son olunene. Aana je mboka ja li je nokutsikila oshilonga she ja dipagua. Je ita vulu nando okuja koosa dojana ja fumvikue pakriste, oshoka oshilando osha li miikaha jaakommunisti. Omunuulepera gumue okue ja kuje moluhodi lue a ti: „Onda hala ndi je ndi ka fumvike aamuojje ku Sunchon, oshoka ngame omunuulepera kaje na shoka taa ningi ndje“. Osho a ningi ngashi a tokola.

„Pii ndje omudipagi guaamuandje!“

Iivike ijaali sho ja piti, kua kala naua mu Sunchon; aakaanakona-shanakalunga itaa hepeke ue. Moskola jomu Sunchon mue ja uo aalongua jomaakaanakona-shanakalunga. Gumue guomaalongua mboka, oje ngu omudipagi guaana ja Y. W. Son. Omusamane Yang okue shi uuvu. Oje nokua cikama a je koombila dojana, e ja talele po. Oje nokue ja kombeleua nokua pula: „Pii ndje omudipagi guaamuandje!“ Aanambeleua oje mu jamukula: „Aa, ua ada po ouala, a si nena“. Yang okua diginine okupula: „Pii ndje omudipagi guaamuandje!“ Eindilo lje ja longo sha. Ojo no je mu pula. „Oto mu ningi shike? Oua hala oku mu dipaga?“ Yang a jamukula: „Onde mu hala opo ndi mu fale ku Jesus, Omukulili guandje, je a ka je peha ljaamuandje mejakulo ljevangelii. Opo tuu a fale ojendji kOmuua Jesus“.

Konima jotundi jimue omudipagi okue ja nomuana omumati naakuluntu je. Yang nokue ja lombuele: „Ondi shi shi one omu hoole omumueni nguka. Ngashingeji oje ta ningi oguandje, omu-muandje, ndi mu longe okutseja Omuua Jesus, ngu e mu sile. Moku mu tseja nkuka, oje ta ka longa iilonga iinene, mbjoka aamuandje ja li je noku ji longa“.

Osho omusamane Yang a taamba omudipagi guojana, nokue mu fala ku Jesus, omupangi omunene a kuce muje uupuidi. Eeno Jesus e mu taamba e mu shitulula a ningi omuntu omupe omuuanaua, nomulongeli gua Jesus.

Ombepo jOmbibeli: „Ino sindua kuuinaji, sinda uuinaji onuuanaua“ ojo ja sindica aakriste jotango, nojo tuu ja sindica mpaka, no taji ka sindica nokomeho ooitaali. Aatondi taa ningua aalongeli jOmuua. Omuua a hala okutula moomuenjo detu choole jokuhalala omuntu kehe ehupico, noonkondo dokufala ku Jesus naatondi je nojete, e ja shitulule ja ninge aalongeli je.

Lja lundululua  
ku E. Angula.



## IILONGANKONDO JA KALUNGA.

### EPAPUDUKO TALI INJENGE NO KOMBALANTU.

Aakriste aauambo ndi shi kutja ja li je nediladilo ndika: aasitagongalo naauvici aakuauo, ojo ajeke ja ucilua okuhokolola edina l'jOmuua. Ihe momapenduko ngaka mua monika, aakriste jouala oji imono je nongunga jokuokolola eso l'jOmulukili.

Ihe pamue nuujamba mbuka ua kuluka megulu, pua tameke uo omapjagano. Aakriste jamue ja sheke no ja tindile mokukala kuonjama jauo. Ihe na mpaka nda hala okutaamba einekelo ndika: „Oshilongo shandje kashi na mpoka tashi ka sindua komijeelo doheli.” Mat. 16:18. Jesus ine tu tumina ependuco ndika a uape oku tu dipaga naljo palutu. Aue.

Edidiliko euanaua lja li mo, oljo ndika, nokutja kamua li euvico. Omahokololo gouala gokuokolola iilongankumue ja Kalunga mokati komagongalo getu. Onkene ndi nokutja oshilonga sha Kalunga oshinenene, oshoka oluindji tua hala tui inekele omauvico nomalongekido giigongi, no tua dimbua Petrus esiku ndija a li a icanenue ku Kornelius. Petrus ka li a longekida euvico, nokuli ka li e shi shi omolua shike a icanua.

Iigongi jomapapuduko ja tameke numvo, oja eta oonte no megongalo ljetu lja Nakajale. Uujelele uajo ue tu denge, no ue tu hata pohi.

Omuuilikigongi mbika okue endele megongalo ljetu eti 14 lja April. Oje okue tu hokololele iilonga iinene ja Kalunga, nokua dimbuluca aantu kutja, pehala mpoka ja kuutumba po, euinaji. Uukriste uaa nomuenjo hau landulua kepunduko mbala. Esiku ndjoka a hokolola ngaaka, kakua li kua dimbululua sha moomuenjo daakuanegongalo. Ihe ehokololo ndika kalja li osima.

Sho pua piti ecimbo, aasitagongalo oja ka ninga oshigongi shauo. Moshigongi shoka omulilo guomapapuduko no guoshihomo sha Jesus gua gee moomuenjo daasitagongalo jetu. Onkene omusitagongalo guetu a zile ko nuupju uomahokololo ngoka. Okua hokolola sha fa eendululo l'jomuuilikigongi jomapapuduko. Omusita okua ningi oshigongi shika konima jelongelokalunga eti 4 lja Mei no eti 11 lja Mei.

Oje sho a hulica, okua landulua koojakuaauo jamue. Gumue ngashi te dimbulukua okua koleke ehokololo l'jomusita, no mokuza muljo okua dimbulukua uo iihuna je noonjata de koshipala sha Jesus. Aapulakeni sho ja etelua ngeji ku Jesus, iihuna jauo noonjata dauo ja li mudo de ja uo momoho gauo. Oja tila, inaa vula ue okumuena, ja cikama no ja hokolola. Aakomeho megongalo ja hempulula tango oondjo niipue jauo megongalo, omontaneho. Aakuanegongalo ja mono ngeji ompito no ja tsikile. Osho ngeji tua kuutumba nokupulakena omahempululo goondjo ecimbo ele shili, ngiika ootundi 12 nenge 13. Iihuna aakueta! Aantu ja kala melandulacano okuja koshipala shegongalo. Omo mua ningilua iilonga iinene ja Kalunga. Oomuenjo da tatulua shili. Jamue ja hempulula omadiladilo gogene nokuli, nkene nago uo oondjo oodigu shili. No nando kua li kua kala iipjaganeki, Kalunga okua longica mutse ompito ndjika ji ninge elongekidotetekeli l'jinima iinene, Kalunga e ji tu tumine ohugunina.

Omulilo nguijaka guigongipapuduko jetu jomu Mei manga inagu ningina naa naa, Kalunga muene okua tumu omvula je ja zi kiihomo iikuauo jokuuzilo. Aagundjuka aatumua 10 aaelimi je ja oku tu ningila iigongi nga mbijaka jokuuzilo.

Nando kua monika ojo aagundjuka manga mokulongela no mokuadika k'Omua guauo Jesus, oje etele egongalo ljetu - ondjokasatana e li ningi oshiljatelole she - e j a m b u k o p o, nombepo jehuamo je ji gongele, no je ji koleke. Kalunga na hambelelue omolua Jesus Kristus guetu.

Iikolica mbjoka ja li ja ningi iipundipangelo megongalo ljetu oja ndjinguandjingu noja tejagulua. Kalunga na hambelelue shili.

Aanona naagundjuka naakuluntu inaa hala ue okumuena, ihe oja hala k'Ombadja, k'Okaoko no muokololo uok'Ombalantu jetu osho nosho. Inaa hala okumuena ouala. Kalunga okue tu popica, aakueta. Omua okua gongele oonzi de. Tu kongacaneni opo omulilo guaa dime mutse.

Otto Kankondi.

### NO KUUKUALUUDI TAKU INJENGE.

„Otse aakualuudi tua mono iigongi jomapapuduko ja zi muuzilo. Iigongi mbika sho je ja moshilongo shetu, tua li katu uvite ko nando okashona. Aantu ojendji inaje ja ko nokuli.

Ngame nda kala mo tuu moluashoka onda li monasaresa. Ondi inekela, ando onda li kegumbo, ando esiku limue inandi ja ko uo.

Omo moka nda taamba edimo po l'joondjo mombinzi Omukulili guandje.”

Osho omugundjuka Leevi Kadila te tu njolele oonkundana dok'Uukualuudi. Omadiladilo ge mu kuata omolu omapapuduko okue ga njola uo omolupe luokateuo taka landula ko.

## ONKUGO JANDJE.

Omaui nga getu ga uven' aakueta,  
Ga kugu muuzilo nok'Omua ngu guetu.  
Amuhe mua mono ombili ndji j'Omua  
Mu tu dimbulukue mu tu fale k'Omua.

Otse mba tua kala muupika uiimenka:  
Madila nekandjo noohula diimenka.  
Ajihe ja ningi iikalunga jetu;  
Malovu ga ningi uo Kalunga ketu.

Oombudi niifundja noontamanana,  
Ja ningi iihuna komoho g'Omua.  
Onkene tua kugu onkugo kune,  
Tu hupicue ano mekano tu ze!

Aakriste tua vuka tua vundakana,  
Tua sheke ajehe ja papuduka.  
Oshoka tse jene tu uete tua guana,  
Makoto gomutondi ge tu guanica.

Tu tseni oongolo uujuni auhe,  
Aakuambi Ngandjera naandongo kuanjama.  
Tu tsakaneeke Jesus megaluko lje,  
Ileni tu jeni oku li popepi.

Leevi O. Kadila

### OMVULA JOMONGANDJERA.

Aakriste oojakueta, onda hala ndi mu tsecijile shili omvula onene shoka ja loko m'Omangandjera 24 sigo 30 lja Auguste.

Efundja enene lja matuka moomuenjo daantu ajehe. Omahodi tua lili shili omolu oondjo detu omasiku goshivike tuu shoka sha hugunina mu Auguste. Oomuenjo daantu oda li po da nika oluhodi olunene shili omolu oondjo, omagalikano omanene ga li po omolu epapudulo lje etelua kutse.

Omua li mu naagundjuka aakadona ji igandja miikaha j'Omua. Jamue ja ti, oje eca omalovu itaa nu ue. Osho uo eca ti jamue je ge eca, itaa nu ue. Osho na ngame onde ge eca. Itandi nu ue omalovu, megumbo l'jandje nde ge eca. Aakriste aakueta, galikane-nii ndje aluhe, ndaa tule ue omalovu moomuenjo guandje. Ondu uvite oluhodi omolu aapagani omboka je nomasheko natse.

Sebastian Iilonga

### OSHIGONGI SHOKU WALVISBAY.

Onda mono shili, Kalunga ta kongo natango oonzi de da halakana nuujuni. Esiku limue mu Walvisbay, sho tua zi miilonga, okua holoka omulumentu ti igida: Shaa tuu tua ljeni, tu jeni kondjugo jonomora 5, oku nomagalikano, okue ja omujenda e noohapu nane. Jamue je shi kuhokolola uo nkene omujenda nguka a kala a ningi iigongi k'Ondobe no k'Edundja no k'Engela, aniuu pua kala iihuna inaji monika nale momagongalo gaaambo.

Onkene tuu ojendji tua jile ko tu nuumbanda, shoka taku tiua, shampa tuu a cikama e ta galikana: Kalunga egululila aantu iijeelo joomuenjo dauo ja mone omajonagulo gauo, aniuu kehe gumue e luete omajonagulo ge kujelela oku ga holola poluelu. Ano tua kala ojendji tua tila, iiholekua jetu taji holoka. Tua ji mo tua fa oondaadi da tumua di ka tale oshilongo ngele tashi uapa okumatukilua.

Onda ji mo ku jele, nani aantu ja lesa nale Mat. 5:8. Sho nda kuutumba, otua lesa 1 Kor. 6:8-10, notua imbi m'Ehangano 269. Ndele onda mono kutja Kalunga te tu kongo shili. Nando ou li kokule oku ku luete. Otse otua li shili tua fa oonzi da kana. Ojendji tua njanjukua shili keuvico oljo lja talaleke oomuenjo dojendji.

Willehard Ashipala.

### ONDOMBUEDI JOMUNJASA.

Ame omunjasa omukueni nda hala oku inu siivifila kutja, onda li mo moulunde, ndele ne onkenda j'Omue inene oja ifana nge no nda efa oulunde omo nda li mo. Onda dimbulukua etilokalunga.

Ove omukueta, oua dimbuluka tuu etilokalunga? Oua efa tuu oulunde? Likonakona, u tale ngenge ua efa tuu sili, ile natango uahokua oulunde.

Absalom Shetekela.



## OLJE TA CIGUA PO?

- Maria, ino pa ndje nando otee natango? Ua dimbua kutja ohandi ji koshigongi shegalikano shongula osondaha kehe?

- Jajee, tatekulu, Sara okua nena po uusiku, kape na ngoka a tseja mpoka e li.

- Sara okui ijaka po? Omolua shike? Nenge ongoje ua ji ookuengu?

- Aue, tatekulu, Sara kee po. Ihe iijeelo ajihe oja patua po, niipatululo oji li meni. Noshu tuu omakende oga patua meni. Na Jonas sho kue tu etele omahini, okua ti aantu ojendji aniuu otaa kongua ngashingeji, oja nena po ouala, kaje po. Jajee, onda tila. Pamue tandi si.

Onda matukile kondjugo ja Sara. Eeno, shili, inandi mu ada mo. Ihe koshitafula she onda mono Ombibeli je oja pandjua ku Luk. 17. Omeho gandje ogi itu mokatopoluagona 34 oka didilikua nopena ontiligane: „Gumue ta taambua nomukuauo ta cigua po“.

- Oh, Omuaa Kalunga, shika osha ningua tuu ngashingeji? Ihe ongame onda cigua po.

Kosheelo shopondje okua konkolua. Onda ke egulula po. Oko okua cikama omukulukadi guokuume kandje N.

- Oua mono tuu omusamane guandje? Oku li mpaka? Nenge okua kucua po kOmuaa gue ngoka okua li he mu hambelele aluhe?

Onda kuatua shili kuumbanda. Jesus okua fa a kuca po shili mboka, ongame manga onda cigua po. Nando onda li handi ji koshigongi kehe, nonda hempulula uo ukriste uandje, nani onda cigua po. Jajee!

Komapandaanda aantu oja matuka koombinga noombinga. Ajehe oja fa ja kuatua koshimpuiju oshidigu. Oja kongo aakuauo nookuume kauo.

Onda ji koshinjanga shegongalo. Mondjila ondi ipumu momupolisi a jemata: „Omuaa, sila ndje ohenda!“

- Oshike sha ningua?

- Iihuna ja ningua. Jamue otaa ti: Jesus okua galuka. Shoka kandi shi shi, ihe onda tseja aantu ojendji ja fa kaje po ngashingeji, nomusersanti guetu okua nena po uo. Ihe ongame onda cigua po. Omuaa, sila ndje ohenda!

Onde endebele shili ndi ade mbala koshigongi shomagalikano. Ihe ohaluka nda kuatua kediladilo ljetilico:- Pamue kaku na nando gumue?

Onda le ndi shune kegumbo, nando nda li popepi noshinjanga. Ihe nkoka omusamane D., omukuluntu guegongalo, okua monika ngaa. Ondu uluma oku mu minika. Ihe naje okua fa a kuatua kuumbanda.

Pokucika kuetu otua ada ko omukulukadi S. nojendji mboka inatu ja mona oluindji, sho ja fa aluhe je nomaimbo ga sha. Ajehe oja fa ja tila. Kapua li pe na ngoka a popja sha, aue, ajehe oja muena.

Ojendji, mboka ja li haa ja kegalikano, inaa monika nena, ngashi omuselekadi ohepele E., nomukuluntu guegongalo I., nomudiakoni T., nomuuanakadona gue Anna, nomuhungi guaaavu Lea nomuheluli guoofraha Otto, na jamue natango.

- Oh, tatekulu G., kashi shi oshili - sho ine ku kuca po ngoje!

Onda punguluka e tandi mono okamati okalongua kandje okapuidi komoskola josondaha.

- Oh, tatekulu G., Jesus okue ja tuu, nenge ine ja? Onda tokelua, nenge ondi necimbo natango okutaamba ehupico?

Onda hala okuza ontuku, ihe okamati oka kuata ndje.

- Omolua shike ino londoda ndje naua. Ombinzi jandje taji ke ku pulua.

Omukuluntugongalo D. okua cikama.

- Otua fa itatu vulu okugalikana nena. Nongashi elongelokalunga ljonena kali po. Omusita guegongalo naanamagalikano ajehe oja fa je tu cigi po. Itatu vulu okuikuca mo mediladilo ndjoka kutja Jesus okue ja kuca po. Itandi vulu okutja ngele otatu ka uapa okugongala etitatu, nenge etine, nenge osondaha taji ja, nenge osondaha jokombanda. Ihe esiku limue otatu ka gongaa ngaa - esiku lja hugunina. . . .

Aapulakeni ji igida: Otua tokelua. Otua cigua po. Jajee! Uoo! Jajee!

Ongame onda dimbulula nkene aluhe onda li handi idiladila ongame muene. Kristus onda li ndi mu na ngaa momutse, ihe hamomuenjo.

Evi olja fa lje ekama, nangame onda tameke okuninginina mo.

Onda papuduka moomposi. Nani onda li nda jaguma ondjodi. Ihe elondodo li cike peni ndi!

Onda nuka mo mombete nondi ihata pevi nokuiigida: „Kalunga, sila ndje ohenda, ongame omunandjo, sila ndje ohenda!“

Onda mono ombili mombinzi ja Jesus. Nena ondi na einekelo ndi ka kucue po, nangame uo, ku Jesus, sho te ja, ndaa pumbue okucigua po. Edina ljomukulili nali bambelule!

Nangoje, omuleshi! Ino tinda ue! Taamba Jesus Omuhupici e ku hupice mekano ljaaluhe. Esiku ljomuaa oli li popepi. Dimbulukua oohapu doka da tumbulua kOmukulili omunamuenjo: „Gumue ta taambua nomukuauo ta cigua po.“

Elundululo pashifo

„Kyrkans Ungdom“

## OUDIJO UA DJA MOMAADI EENJIKI.

Kokule mu Afrika popepi nondjila jetango (Ewenaar) oku na okuankala vanini molutu nomufika („Dwergies“). Ovo ohava ningi oudijo uokudipaifa oifitukuti. Otaku tiua ohave u kufa momaadi eenjiki. Ou uditeko tuu, oudijo tau di moshima shinjenje hashi liua.

Ngashi nana ovakuankala hava kufa oudijo meenjiki, osho jo satana ha kufa oudijo tau ljana mOmbibeli. Spreuke 14: 12.

1) Oudijo uongerki. Ondi li mongerki jopaevangeli ile jopakatoli, onke ohandi ji meulu. (Oto dulu okukala mongerki eji ile inja, nde to i mekano)

2) Oudijo tau di meshasho. Onda shashua, onke ohai ka hupifua. (Oto dulu okukala ua shashua, ndele to i moheli)

3) Oudijo tau di mOuvalelo Ujapuki. Ohandi ji alushe koshililo shOmuene, onke ohandi ji meulu. (Oto dulu u kale ho ji koshililo, ndele to i moheli)

4) Oudijo tau di mokulesha Ombibeli. Ohandi lesa ongula nonguloshi, onke ohandi ji meulu. (Oto dulu okulesha Ombibeli aishe, ndele to i moheli)

5) Oudijo uoilonga iua. Ame ohai jandje oijandjiua jongerki aishe, nohai kuafa eehepele, onke ohandi ji meulu. (Oto dulu okutunga ongerki nokujandja oinima joje aishe keehepele, ndele to i moheli.)

6) Oudijo uomoujuuki uoje muene. Ame ondi mujuuki ndi dule uinja, ihai nu oikoluifa, ihai vake, ihai lundile. (Oto dulu u kale iho longo aishe ojo, ndele to i moheli)

7) Oudijo Kalunga ohoole. Kalunga ohoole, onke ita handukile nge. Nge to lesa Ombibeli oto mono kutja „Kalunga oje omundilo tau ljana.“ Heb. 12:29. Osho omutondi ta longifa oudijo u li li nou li li, ta kufa meendjovo dinjenje devangeli nokudipaa eemuenjo detu.

Meulu ohandi i mo hano ngahelipi? Osho to pula. Joh. 3:5. Jesus okua tja kuje: „Oshili shili handi ku lombuele: umue nge ina dalululua momeva no mOmpepo nomoshili, oje ita i moshilongo sha Kalunga.“

1Joh. 1:9. „Ngenge hatu hepaulula oulunde uetu, oje omudiini-ni nomujuuki oku tu dimina po omatimba etu, note tu kosho omanjonauno etu aeshe.“

Meulu ohandi i mo hano ngahelipi? Osho to pula. Joh. 3:5.

Jesus okua tja kuje: „Oshili shili handi ku lombuele: umue nge ina dalululua momeva no mOmpepo nomoshili, oje ita i moshilongo sha Kalunga.“

1Joh. 1:9. „Ngenge hatu hepaulula oulunde uetu, oje omudiini-ni nomujuuki oku tu dimina po omatimba etu, note tu kosho omanjonauno etu aeshe.“

Lesha nokudiladila shili.

G. A. Hangula.

## OUKAUME UOUNJUNI.

Ovahoolike, novamuameme mu Kristus Jesus, onda hala oku mu dimbulukifa, one amushe mua hala okuupalela Kalunga nOmukulili uetu, no mua hala shili mu na oukaume na Kalunga mu Jesus, Omuhupifi uetu. Onda hala mu kukume oshiponga eshi shinene shili, osho oukaume uounjuni. Oukaume uounjuni ouo oshiponga shili. Jakob 4:4 tamu tiua: „Ou a hala okuninga okaume kounjuni, oje ta ningi omunaita na Kalunga.“ Ovahoolike, ame onde shi mona shili, kutja mboli omukriste nge moukriste uoje to etele mo ondova okuninga eume lounjuni, oto eta oita ja kula pokati keni na Kalunga.

Unene onda hala okupopifa ovanjasha nje va Kristus. Lungameni oshiponga eshi shinene shili, mu kale mu shi shi, onje ovahoololua va Kalunga, noshuana shijapuki. Tala 1 Petr.2:9-10. Hano ngele tua shiiva shili ofje oshuana sha Kalunga, tu endeni pami-kalo tadi uapalele Kalunga ketu. Tu litonatele shili, opo tu ha hangike kenjonauke lomuenjo no lokolutu jo. Ame itai pumbua oku mu fatululula kutja oukaume uounjuni oshike, nashike. Ohai mu dimbulukifa ashike mu papuduke mu hale shili okukala mua jela, ngashi Omueene uetu a jela.

Ovahoolike, tu haleni shili tu kale tua jela moilonga jetu, nomokupopja kuetu, no meenkedi detu adishe, opo tu kale tu na ekuatafano na Kalunga. Omukuetu, shiiva, kutja oua japulua ku Kalunga, eshi ua shashua, no ua ninga uomongudu ijapuki, oje eongalo la Kalunga. Lalakanena hano oilonga ja jela noijapuki, osheshi u li moshili no moujapuki. Oje iha kuatafana nondova, osheshi oje oujelele uovene. Tu henukeni nokutondela oukaume uonjata nounjuni. Fje tu hale shili oukaume uOmushiti uetu, okeenkono hatu di peua kOmufindani. Oje Kristus, ehupifo lemuuenjo detu.

Ua kundua nohoole iua ku S. I. Hamukoto.

## OMAPAPUDUKO

tage ende opendji.

Mu Oos-Londen tamu hokololua aaluude 2000 oja kuatua kombepe jeitedululo no ja hala okuopaleka oonkatu dauo.

Kontuntu ja Ginea Ompe aitedululi taa popiua 15000 nokuli, no ku Korea, nkoka iita taji dipaga aantu, omajuvi nomajuvi taa kongo omuenjo mu Jesus.

Aana ja Kalunga taa didilikua muujuni auhe. Etango lja fa lja toko shili.



## AAJUDA JOMU JOHANNESBURG.

Ojo oja gongalele koshituci shauo sha hakhel ngashi osha uucua mEtestamenti Ekulu, oje nokugongala omumvo kehe omutihejaali gu kale omumvo guesabati. Iituci mbika inji digininua ue mehalakano, onke ano oju uvite esiku enene ndika eti 10 lja Oktober, sho ja mono ompito okugongala mu Johannesburg. Aajuda 2000 oja gongala okupulakena oohapu dEtestamenti Ekulu.

Omasipa ga toka ga tameke okuinjenga shili.

## OMASHASHO NOMAKOLEKO GAAUAMBO JE LI MEHALAKANO.

KOkahandja ofje tua li tu na oshivilo sheshasho nosheko-leko eti 3 la Auguste. Opa li ehafo linene. Omuhongi munduisi, O. Milk, oje e va japulila okukala paitavelo ovakolekua 9 novashashua 10. Ofje tua tala oipala javo ja vadima eshi tava tu eengolo koshiilikaneno nelininipiko va muena filu, ve udite shili ve li koshipala shOhamba jeehamba.

Frans Simon.

MOrangemund otua li menjanju enene molu aakuetu ja siluaohenda. Eti 23. 9. 52 mua shashua 101 no mua kolekua 83.

Inamu eca oku tu galikanena otse mbaka tu li momavi goko-kule. Otu li po tua hepa. Jamue itatu mono mo ecimbo ljokuja komambo.

Immanuel Amunjela.

Ku Abenab eti 10. 8. 52 omo tuu mua dalululua ovamua-meme va shashua ovantu 33 mo mua kolekua 21. Opa li shili ehafo linene.

Eti 8. 8. 52 tua shiivifilua omuhona munene te uja oku tu tala po. Eti 9 la Auguste e tu holokela shili. Okue tu hanga tua jela naua nokue tu hafela unene. Oje e tu leshela Joh. 12:44-50.

Ovamua-meme, Jesus te tu hanga tuu tua jela, je e tu pe ondjabi jomuenjo.

Tomas Sheja.

## EGALIKANO LJA SALOMO.

„Jehova Kalunga, ongoje ua tula ndje, omuntu nguka guoje, muukuaniilua mbuka ua tate David. Ihe, ongame omugundjuka, inandi guana natango oondunge duukuluntu, onke ano no tandi ku indile, u pe ndje uo oondunge oombuanaua nomuenjo gu'uuka guokupangela aantu, nokujoolola uuanaua nuuinaji.“

## OMUGUNDJUKA!

Konga ondjila ja Salomo. Ngoka kee noondunge, jaijee, nkene a hepa muujuni. Ooskola ngele tadi ka tameka, nangoje kala ua adika ui ilongekida, ngu ka konge omalongo, oondunge doje di deulue naua.

Ihe tangotango konga omuenjo gu'uuka. Omuenjo guomuntu kehe gua jonuka, no gua nik'omilema omolu uulunde. Ihe oohapu da Kalunga tadi minikile, no tadi jogo omuenjo gua nguka ti iuuka kudo. Konga elongo ljoohapu da Kalunga, uuoposi uomuenjo guoje u minikilue, nuuinaji uomuenjo guoje u jogue, ngu uape okuenda oondjenda da jela muujuni.

## OLUHEPO LUOKOOHA DUUKUAMBI.

Uukuambi ouo oshilongo sha halakana noonkondo. Aantu taa ende oondjila oonde, uunene okuja kongerki. Mboka ja tembukila momakuti gUukuambi oje na oluhepo. Haluhepo luonguo niikulja, aue, luondjila jokuja ku Elim, hoka taa jakulua.

Onke omolu ehalakano nomakuti, ojendji oja shuna muupagani, na jamue ja kuatua konjalo jokuenda ondjila onde komambo. Ihaa holoka ue naua.

Aanona ojendji taa kala ouala momagumbo, komanongelo ihaa ende ko, oshoka ondjila onde.

Ihe oondjila adihe oofupi ku Kalunga Tate. Omo te ende momakuti ngoka ge naantu ojendji ja fa oonzi daa nomusita. A dikila mo nokuli omanongelo, opo aanona naakuluntu uo ajehe e ja palucice oohapu de.

Jajee, aantu je li po ja fa oompugulu nuupugulugona daa uete omeja. Ihe aanona otaa matuka nguupugulugona, tau matukile kedija, manga aakuluntu ja fa oompugulu di igilila enota. Ojo ja fa

kaa na ko na sha noohapu doka tadi mueneke enota ljokomuenjo. Uunene aalumentu kaa na naa naa uupenda okuholoka miigongi jaakriste.

Oluhepo olunene lu li momakuti ngoka guuninginino jUukuambi. Nando je na uungulu uoskola, kaa na ongerki, moka taa jakulilua no taa ningilua elongelokalunga. Ihe na mpaka Tate Kalunga a tseja oluhepo luaantu je. Oje a tula moomuenjo daapangeli ezimino euanaua ljejala ndjoka li nokutungilua ongulu taji guana okujakulila aantu je li mokuti kuuninginino u'Uukuambi.

Oojakuetu ne, inamu dimbua po aantu je li moluhepo lu cike mpoka, opo Tate Kalunga e ja pe uupenda uiilonga taa ka kala je ji na komeho. Ngashingeji oja fa naa naa okadila nuudilona uako, uaa na oshihadila, moka tau holama mo ombepo juutalala.

Ehalakano nomakuti lje etele uo oluhepo ndoka inalu guana okudimbua. Shaa tuu to ende nomagumbo, oto aada aantu ja lala taa alukua, no itaa makele omuti omolu ondjila onde okuaada kii-pangelo. Oluhepo nduka olu shi uo okufalelua ku Tate Kalunga. Ojendji inaa dimbulula ekuaco lja Kalunga miipangelo. Jamue ja dimbulula tuu ekuaco ndika lja Kaiunga li li miipangelo.

Natu tsakaneneni koshipundi shesilohenda.

Tomas Shindongo.

## ETSEJICILO.

Oseminari jaakadona mOngandjera taji taamba aalongua aape esiku 26 lja Januarie 1953, otundi onti 7 ongula. Oombapila adihe odi nokucika kOngandjera manga esiku eti 15 lja Januarie inali cikana, odo doka:

- 1) Ombapila jegongalo (ngoka te ja mu seminari, e nokuadika a guanica oomvula 18)
- 2) Epopilo ljomukuluntu, omulongi guokagumbo.
- 3) Enjolululo ljonzapo jokagumbo.
- 4) Ehokololo ljomukadona muene.
- 5) Ombapila jomupangi taji hokolola ngele a kola.

Omukadona kehe oku nokuisila oshimpuiju kombinga jilja, a kongele oseminari iilja oolata ndatu (3) momumvo. Iilja mbjoka te ji futua. Oolata mbali oku noku di eta moshikako shotango, ndjoka jimue manga oshikako oshitijaali inashi hula.

Omukuluntu guoseminari,  
Ongandjera.

## OMUALU GUAANTU

miilongo jokOuambo  
pajalulo ljoforomenta 1951

Aakuluntu Aanona Ajehe  
Oshilongo aalumentu aakiintu aamati aakadona kumue

Uukuanjama	21785	25810	17074	16782	81451
Ondonga	14895	16024	11277	11208	53404
Uukuambi	5988	6534	4816	4901	22239
Ombalantu	3410	3872	2865	2811	12958
Ongandjera	3222	3757	2868	2956	12803
Uukualuudi	2280	2817	2060	2087	9244
Uukolonkadi	708	815	632	652	2807
Eunda	907	932	536	523	2898

Kumue 53195 60561 42128 41920 197804

Aakuankala jokOuambo

Oshilongo	Aalumentu	Aakiintu	Aanona	Ajehe kumue
Uukuanjama	101	119	124	344
Ondonga	242	269	326	837
Uukuambi	47	75	129	251
Ombalantu	-	-	-	-
Ongandjera	176	249	239	664
Uukualuudi	35	37	73	145
Uukolonkadi	33	51	78	168
Eunda	16	15	15	46

Kumue 650 815 984 2449